


Trabaonan di preparacion pa edificio nobo di Museo Arqueologico Aruba a cuminza

ORANJETSAD (AAN): Aña a habri cu un hopi bon noticia pa Museo Arqueologico Aruba en par-

ticular y naturalmente pa henter comunidad. Despues di hopi aña di esfuerzo y preparacion trabaonan di



mobilizacion pa restauracion y construccion na edificionnan historico den Schelpstraat a cuminza.

E Edificio aki mester bira e futuro ubicacion di Museo Arqueologico. Manera ta conoci Gobierno di Aruba na final di añanan 90 a cumpra e compleho di edificionan di famia Ecury como parti di e proyecto pa haya un lugar digno pa studia, documenta, cuida y presenta e herencia arqueologico di Aruba. Fondo di Union Europeo a bay di acuerdo pa financia e proyecto cu 4.4 milyon euro y aña pasa a firma e convenio di financiamiento cu Gobierno.

Den un destaho publico pa trabaonan di restauracion y construccion e compania ALBO Aruba N.V. a gana e contrato pa e trabaonan aki. Dia 15 di Februari ultimo e compania a cuminza mobiliza y ta planea pa cuminza ehecucion di e trabaonan asina cu cierto rekisitonan keda cla.

E edificionan historico y

esnan nobo lo inclui salanan di exposicion, espacio pa estudio cientifico, un deposito pa e coleccion, espacio pa trabaonan educativo, un auditorium y un centro di documentacion. E salanan di exposicion nobo pa Museo Arqueologico lo ta casi seis biaha mas grandi cu espacio actual y pues lo duna espacio pa expone hopi mas obheto di e coleccion. E compleho di edificionan tambe lo inclui un edificio nobo cu lo ser usa pa arte contemporaneo.

E proyecto ta titula "Museo Nacional Aruba" y e fundacion cu lo ser lanta pa maneha e Museo Arqueologico nobo lo hiba e

mesun nomber. Pa a yega asina leu cu e proyecto aki mas cu claro Museo Arqueologico a haya sosten di varios instancia y institucion. Gobierno pa medio di Ministerio di Cultura y di Finanzas hunto cu Parlamento di Aruba a acorda pa pone sumanan adicional disponibel pa e proyecto.

A adkeri e tereno habri banda di e compleho pa e por ser usa awor pa materialnan di construccion y den futuro como parti di Museo Nacional. Departamento di Asuntunan Economico, Bureau di Monumento y DOW a traha hopi aña hunto cu Museo Arqueologico pa prepara e proyecto y hay'e asina leu. Museo Arqueologico ta hopi agradecido na e instancianan aki y ta orguyoso di a traha cu expertonan local pa logra e proyecto.

Na Direccion di Finanzas ta bay un palabra special di danki y tambe di elogio pa nan esfuerzo pa identifica e proyecto aki como un di gran balor pa comunidad. Durante e proximo lunanan Museo Arqueologico lo sigui informa publico tocante e proyecto aki.